

որ ամէն ինչ «կուգայ ու կ'անցնի» եւ որ էականը լինելն է եւ ոչ լինելիութիւն ձեւացնելը: Ու իր խաչի վրայ նա սպասում է կերպարանափոխման վսեմ վայրկեանին:

— Նայի՛ր, ահա այդ մայրիներով ծածկըւած բարձրութեան վրայ Դարաչիչադն է, երեւանցիների ամառանոցը: Պատերազմից առաջ ունեւոր դասակարգը ամառը թափուում էր այստեղ՝ կառավարչից սկսած մինչեւ վերջին գրագիրը:

— Երեւակայում եմ...

— Մեծ երեւակայութեան պէտք չկայ՝ թղթախաղ, «թագաղուզի», ճերմակ գինի եւ գունդ:

— Տիկնայք եւ օրիորդներ... ծառերի տակ ծածուկ համրոյրներ...

— Ձեմ սիրում ամառանոց ասուած վայրերը. ներքնագրեստի եւ քրտինքի հոտ է գալիս ու մարդիկ գոհակիւնում են, լրբանում...

— Ահա Ձանդուն...

— Ձանդուն:

— Այո՛, համր եւ խուլ, գրեթէ աննշմարելի: Ծրջապատող հողմերը ճահճացրել են, տարածուել են ամէն կողմ, շուրաւ ճամբորդի նման: Գետերը եւս իրենց զարգացման աստիճաններն ունին, ինչպէս երգը: Այստեղ Ձանդուն դեռ մեկամղձոտ հառաչ է: Սիրտը կոկորդի վրայ յենուող անորոշ կանչ, ձայնի միամիտ նայուածք: Վարը, նա իր թափը կ'առնի լեռներից, կը գտնի իր փոսը եւ կարկաչուն ելեւէջներով կը գլորուի անդուսպ քայլերով նման եւ կը հնչեցնէ իր արծաթէ բորոգանները:

— Լի՛ճը, ահա լիճը...

— Սեւան, Սեւան:

5.

Թմրած մեր քայլերի տակ լռութիւնը ծանրօրէն երերում է:

Իջնում ենք վար, նստում ափի պսպղուն մանրախիճերի վրայ: Ոչ ոք չի խօսում: Վայրի բազերի անցնող մի երամ — բազե՞ր են արդեօք — նիզակի սրածայր երկաթի նման ծակում է միջօրէն, եւ երկինքը բաց է անում իր տանիքը:

Վսեմ եւ խոր այս լայնութեան առջեւ ամէն ինչ փոքրանում է. տարածութիւնը ձեռ-

քերիս վրայ թանձրացած ճառագայթների եղեամ է կապում: Ինձ զգում եմ այնպէս, ինչպէս աղբեկութի եղանակին ամսերի մօտ թաւալ եկող գինով մի թռչուն:

Նախ արծաթով ծաղկուած լոյսերի դաշտ է, մի տեսակ կոյր յստակութիւն, պայծառ մի մրափ, ուր էութեան ճերմակ նաւը՝ կոկոր ծակերով հնչուն մի սրինգ՝ դանդաղօրէն սուղուում է մեծ մի ծովածոցում մանդնդում: Ապա, կամաց կամաց, իրական պատկերը մարմին է առնում, եւ երկինքը թափ է տալիս իր սաւանը: Բայց ես՝ գլուխս վար եմ առնում, ինչպէս հեշտասէր այն աստեղագէտը, որ դողալով մօտենում է ջրհորին ամենաթարմ աստղերը քաղելու համար: Ձեռքերիս մէջ եմ առնում ողորկ եւ փայլուն քարիկները եւ ականջ դնում չգիտեմ ո՞րտեղից եկող հեռաւոր ձայներին:

Ես ճանաչում եմ լճերի լեզուն: Լեմանը, Գարդան, Կօմօն եւ Հոռմայ բլուրի վրայ, Ալբանայի լիճը եւ Նեմին, Ասիդիի ճամբին՝ Տըրազիմինոն... Գիտեմ այծտերեւի եւ թէյվարդի հարբեցուցիչ բուրումը, լազուր ջուրերի մէջ ընկղմուող նոճիների եւ մայրիների ստուերները, կածանների շոյող վերելքը, աչքերի ծաղկանուտ տոնը, վերջալոյսների կարմիր սրինգները, գոյների շլացուցիչ խաղերը... Այնտեղ մի օր, հիւսեցի օրերի պոսկը, եղայ, ինչպէս սիրած կնոջ առաջի մերկացումի առջեւ՝ սարսուռ եւ տենդ, լոյս եւ գիշեր, չափազանց կեանք, ուստի եւ մի քիչ մահ: Մտերիմ եւ զարգարուն վայրէ՛ր, բնութեան գրքի մէջ բոցավառ ձեռքով գրուած էջեր:

Այստեղ, հողերի տակ պառկած խուլ մի թմրուկ պատուել է լերան գլուխը: Հրաբխային մի ուժ վտարել է հորիզոնը, եւ Հայաստանը բաց է արել երկնքի դէմ հսկայ մի աչք:

Ձախ կողմից, կոնակը լիճին տուած, նըստել է գերբնական ուղտերի մի կարաւան: Մըրրիկների քանդակած այդ ժայռերը նայում են դէպի դուրս՝ ուրիշ մի երկրում բացուող ճանապարհներին, ու ծանր այդ սպասումը մթնոլորտի մէջ հոգեկան անակնկալների շեշտ է դնում: Դիմացի ափը, տակն ու վրայ եղած ողբերգական մի կրկէս է, ուր դժբախտութիւնը եւ տրտմութիւնը քարացած լաւաների դէմ